

四庫全書

史部

欽定四庫全書

史部

元和郡縣志卷二十二

詳校官編修_臣曹 斌

檢討_臣德生覆勘

總校官庶吉士_臣倉聖脉

校對官中書_臣方大川

謄錄監生_臣黃 鑫

欽定四庫全書

元和郡縣志卷二十一

唐 李吉甫 撰

河北道二

恒州 常山大都督府

開元戶四萬二千六百九十四

鄉八十七

元和戶一萬七千五百八十

鄉七十

今為恒冀節度使理所

管恒州冀州深州趙州德
州棣州 管縣四十四

都管戶六萬一千六百四

禹貢冀州之域周為并州地春秋時屬鮮虞國戰國時屬趙秦兼天下為鉅鹿郡之地漢三年韓信東下井陘擊破陳餘趙王歇以鉅鹿之北境置恒山郡因恒山為名後避文帝諱改曰常山兩漢恒山太守皆理于元氏晉理于真定即今常山故城是也後魏道武帝登恒山郡城北望安樂壘嘉其美名遂移郡理之即今州理是也周武帝于此置恒州隋煬帝大業九年罷州以管縣屬高陽郡武德元年重置為恒州三年陷賊四年討平

竇建德仍舊焉

州境

東西二百一十里
南北二百七十里

八到

西南至上都一千九百九十里
西取太原路至上都一千七百六十里

西南至東都一千一百三十里

東北至定州一百二十里

東南至橐城縣六十里從橐城北至定州一百二十里

東南至深州一百八十里

西取井陘路至太原府五百里

西北取五臺山路至代州五百三十里

貢賦

開元貢羅

緜絹

管縣十

真定 藁城 九門 靈壽 行唐 井陘

獲鹿 石邑 房山 鼓城

真定縣

望郭下

本名東垣屬中山國以河東有垣縣故此加東字高帝十一年代相陳豨反帝自攻拔之改曰真定屬恒山郡武帝改為真定國後漢復為縣屬常山郡後燕慕容垂都之後徙理盧奴隋開皇三年貞定縣改屬恒州皇朝

因之

滋水北去縣三十里

潯沱河南去縣一里

故權城即古之犍鄉也縣北二十里後漢建武元年賈復破青犢于射犬追戰于真定之犍鄉大破之即此地也

橐城縣

緊西北至州五十八里

本漢舊縣元鼎四年置屬真定國後漢改屬鉅鹿郡晉

省後魏重置高齊改為高城縣隋開皇十八年復為橐城縣武德初屬廉州貞觀二年改屬恒州

肥累故城縣西南七里春秋時肥子國白狄別種也

濩洹水去縣二十九里

九門縣

上西至州三十里

本戰國時趙邑漢于此置九門縣屬常山郡高齊省隋開皇六年重置義旗初于此置九門郡後廢以縣屬恒州

潯沱水在縣西九十里

案前真定縣潯沱河去縣一里則去州治亦一里此九門縣既

云西至州三十里而潯沱水乃云在縣西九十里必有誤

滋水北去縣二十三里

靈壽縣

中東至州八十里

本中山國都也按中山武公本周同姓其後桓公不恤國政後樂羊為魏將拔中山封之靈壽漢于此置靈壽縣屬常山郡後漢屬常山國隋開皇三年改屬恒州武德五年屬并州七年改屬恒州

潯沔水在縣西南二十里

行唐縣

上南至州七十里

本趙南行唐邑惠文王初置漢因為縣屬恒山郡後魏去南字為行唐縣隋開皇三年改屬恒州皇朝因之

玉女山縣北三十六里

滋水去縣南二十六里

井陘縣

中東南至州九十里

六國時趙地秦始皇十八年王翦興兵攻趙下井陘漢

三年韓信張耳東下井陘擒成安君即此地也陘山在縣東南八十里四面高中央下如井故曰井陘漢屬常山郡隋開皇十六年于縣置井州大業二年廢縣屬恒州武德元年重立井州貞觀十七年廢縣又屬恒州緜蔓水在縣西南八十里韓信擊趙使萬人先行背水為陣信曰陷之死地而後生謂此水也

獲鹿縣

中東北至州五十里

本漢石邑縣地屬常山郡隋開皇十六年于此置鹿泉

縣以鹿泉在漢縣南因為名屬并州大業二年省義寧
初重置還屬并州貞觀二年改名獲鹿屬恒州

飛龍山在縣南四十五里前趙錄曰王浚遣將祁弘率
鮮卑討石勒于飛龍山下勒大敗

葦山今名抱犢山韓信伐趙使輕騎二千人人持一赤
幟從間道葦山而望後遂改為葦山後魏葛榮之亂百
姓因山抱犢而死故以為名又云抱犢者古有其名也
即道家謂之北岳佐命是也名山記以為福地之數云

可避兵水也

井陘口今名土門口縣西南十里即太行八陘之第五陘也四面高中央下似井故名之韓信擊趙欲下井陘成安君陳餘聚兵井陘口號二十萬李左車說餘曰臣聞千里餽糧士有飢色今井陘之道車不得方軌騎不得成列行數百里其勢糧食必在後願足下假臣奇兵三萬從間道絕其輜重足下深溝高壘勿與戰彼前不得鬪退不得還吾奇兵絕其後野無掠擄不至數日兩

將之頭可致麾下成安君儒者不從故敗述征記曰其
山首自河內有八陁井陘第五四面高中央低似井故
名之

鹿泉出井陘口南山下皇唐貴族有土門崔家為天下
甲族今土門諸崔是也源出博陵安平

石邑縣

縣東北至州三十里

本戰國時中山邑也史記趙武靈王攻中山取石邑是
也漢于此置石邑縣屬常山郡後漢至隋不改皇朝因

之

鹿泉水一名陘水南去縣十里

趙佗墓縣北十三里佗真定人僭號南越帝文帝為其
先人置守冢昆弟在者存問之佗遂釋黃屋左纛而稱
臣

房山縣 中東至州八十里

本漢蒲吾縣地屬常山郡隋開皇十六年置房山縣因
縣北房山為名屬井州大業二年廢井州縣屬恒州武

德四年又屬井州貞觀十七年又屬恒州其城內實外險一名嘉陽城

房山一名王母山在縣西北五十里漢武帝于此山上立祠今王母觀是也

蒲吾故城在縣東二十里

鼓城縣

中西北至州九十五里

本春秋時鼓子國蓋白狄別種也又漢曲陽縣地左傳曰晉荀吳圍鼓以鼓子鳶鞮歸漢下曲陽屬鉅鹿郡隋

開皇六年置昔陽縣十八年改為鼓城縣屬鹿州大業九年改屬高陽郡貞觀元年屬定州大厯三年割屬恒州

潯沱水去縣北十三里

魏收墓在縣北七里後魏北齊貴族諸魏皆此邑人也所云鉅鹿曲陽人者是矣

後漢京觀在縣西南七里後漢皇甫嵩攻黃巾賊張角弟寶于下曲陽首虜千餘人築為京觀

冀州信都上

開元戶九萬四千一百二十
元和戶八千九百六十七
鄉一百八十五
鄉四十八

禹貢冀州堯所都也虞及三代同為冀州地爾雅曰兩河間曰冀州冀近也兩河之間其氣相近春秋時屬晉七國時屬趙秦屬鉅鹿郡漢高帝分趙鉅鹿立清河信都常山其信都即今州理是也文帝又分立河間廣平二郡景帝改信都為廣川國宣帝復故後漢初王郎僭號河北悉應光武自薊南行至下博失道有白頭公曰

努力信都為長安守光武至信都太守任光果開門出迎即今州理是也明帝更名樂成國安帝更名安平國後漢末韓馥為冀州牧公孫瓚欲襲之袁紹使高韓諷馥令以冀州讓紹馥素性怯因然其計馥長史耿武諫曰冀州北鄙帶甲百萬穀有十年表紹孤客窮軍譬如嬰兒在股掌之上絕其乳哺立可餓殺奈何以州與之馥不從以州與紹紹遂領冀州牧及曹公破紹又理之文帝黃初中以鄴為五都之一始移冀州理信都自石

趙至慕容垂或理鄴或理信都苻堅用王猛為冀州牧
鎮鄴後魏冀州亦理于鄴仍于信都為舊冀州之理置
長樂郡隋開皇三年罷郡為冀州大業三年復為信都
郡隋末陷賊武德四年討平竇建德改為冀州

州境

東西二百六十里
南北二百三十六里

八到

西南取相州路至上都一千九百里
西南至東都一千四百里

北至瀛州二百四十里

正西微北至趙州一百六十里

西北至深州一百三十里

東至德州二百一十五里

東北至景州二百一十里
東北至滄州一百二十里

貢賦

開元貢賦

絹

絹

管縣九

信都 衡水 南宮 武邑 下博 武強

棗強 堂陽 阜城

信都縣

望郭下

本漢舊縣屬信都國後漢屬安平國後魏屬長樂郡隋
開皇三年屬冀州皇朝因之

衡水亦曰長蘆水即濁漳水之下流也西北去縣六十
二里

辟陽故城在縣東南三十五里審食其為辟陽侯

煮棗故城在縣東北五十里漢煮棗侯國城六國時于
此煮棗油後魏及齊以為故事每煮棗油即于此城

衡水縣 上南至州四十里

本漢桃園之地隋開皇十六年于今縣置衡水縣縣在
長蘆河西長蘆河則衡漳故瀆也因以為名

長蘆水縣南二百步

蘭相如臺在縣東北十二里

南宮縣

望東北至州六十二里

本漢舊縣屬信都國後漢書光武自薊南馳至南宮遇
大風雨引入道傍空舍馮異抱薪鄧禹燃火帝對竈燎
衣即此地也後漢屬安平國高齊省隋開皇六年復置
南宮縣皇朝因之

絳水故瀆縣東南六里

武邑縣

上西南至州九十里

本漢舊縣屬信都國後漢屬安平國高齊省隋開皇六年復置屬冀州皇朝因之

長蘆水北去縣三十二里

觀津城在縣東南二十五里本趙邑也趙孝成王封樂毅于觀津號望諸君又漢景帝母竇太后觀津人也

武強湖在縣北三十二里

下博縣

上南至州一百里

本漢舊縣屬信都國以太山有博縣故此加下字後漢

屬安平國後魏屬長樂郡隋開皇三年罷郡屬冀州十

六年屬深州皇朝因之貞觀十七年改屬冀州

案舊唐書下博

縣貞觀元年屬深州十七年屬冀州先天二年屬深州開元二年還冀州此所志略而未備

下博故城在縣南二十里即漢光武失道之處也光武

自滹沱南出至此失道不知所之遇白衣老父曰努力

信都為長安守去此八十里從之也

長蘆橋在縣南架長蘆水

武強縣望西南至州一百三十里

本漢武隧縣地也屬河間國晉于此置武強縣屬武強郡高齊改屬長樂郡隋開皇三年改屬冀州貞觀元年改屬深州後屬冀州

武隧故城在縣東三十一里秦破趙將扈輒于武隧斬首十萬即此也

武強故城在縣西南二十五里漢將嚴不識以擊黥布功封武強侯後漢王梁為武強侯

棗強縣

上西北至州六十八里

本漢舊縣屬清河郡高帝以留盼為棗強侯

案漢書功臣表作彊

留盼

其地棗木強盛故曰棗強後魏屬長樂郡隋開皇

三年屬冀州皇朝因之

縣外城即姚弋仲之故壘也

棘津故城在縣東北二十七里左傳曰晉荀吳師涉自

棘津史記曰呂望東海人也老而無遇賣食棘津

堂陽縣

上東至州六十五里

本漢舊縣屬鉅鹿郡在堂水之陽按長蘆水亦謂之堂水在縣南二百步縣因取名後漢屬安平國高齊省隋開皇十六年重置屬冀州皇朝因之

阜城縣

緊西南至州一百四十里

本漢舊縣屬渤海郡後漢屬安平國隋開皇九年改屬觀州大業二年復屬冀州武德四年復屬觀州貞觀十七年廢觀州又隸冀州

苻融壘在縣東北二十四里

深州 饒陽上

開元戶四萬二千二百一十五
元和戶一萬四千九十七

鄉七十五
鄉五十

禹貢冀州之域七國時為趙地秦為鉅鹿郡地漢為饒陽縣地屬涿郡隋開皇十六年于饒陽置深州以州西故深城為名大業二年廢深州武德元年討平竇建德四年復置貞觀十七年又廢先天元年于今理重置

州境東西九十里
南北一百一十里

八到西南取趙州路至上都二千五十里
西南至東都一千三百二十里

正西徽北至恒州一百八十里
西南至趙州二百里
東北至瀛州一百四十五里

貢賦開元貢
賦絹絹縣

管縣四

陸澤 鹿城 饒陽 安平

陸澤縣上郭下

本饒陽陸城二縣地先天元年因置州割二縣置陸澤
縣禹貢大陸既作此縣南三里即大陸之澤因名之

鹿城縣

上東至州二十五里

本漢安定縣地屬鉅鹿郡高齊改曰安國隋開皇六年
于此置安定縣取漢舊名屬定州十八年改為鹿城取
縣東故鹿城為名也改屬冀州貞觀元年改屬深州
衡漳水在縣東十里

滹沱河水縣西北四十二里

大陸澤在縣南十里

饒陽縣

望西南至州三十里

本漢舊縣屬涿郡在饒河之陽隋開皇三年改屬定州
十六年屬深州大業二年省深州改屬瀛州武德四年
屬深州

滹沱河北去縣四十五里

州理城晉魯口城也公孫泉叛司馬宣王征之鑿滹沱
入泃水以運糧因築此城蓋滹沱有魯沱之名因號魯
口後魏道武帝始三年車駕幸魯口即此地也

蕪蕪故城在縣東北三十五里隋縣也蓋因東北蕪蕪

亭為名

蕪婁亭在縣東北四十五里後漢光武帝自薊東南馳晨夜至饒陽蕪婁亭飢甚馮異進豆粥光武帝曰得公孫豆粥飢寒俱解公孫異字也

安平縣

上東南至州五十三里

本漢舊縣屬涿郡高帝以鄂千秋為安平侯後漢屬博

陵郡

案安平縣後漢志屬安平國晉志屬博陵國此有脫誤

後魏以來博陵諸崔

即此邑人也隋開皇三年縣屬定州十六年改屬深州

大業二年還屬定州武德四年又屬深州

泆水今名疆河西自定州義豐縣界流入

潯沱河在縣南二十三里

趙州趙郡望

開元戶五萬一千四百三十

鄉九十九

元和戶八千一百五十七

鄉一百一十一

禹貢冀州之域春秋時屬晉戰國時屬趙秦為邯鄲郡
地漢為常山郡平棘縣地又為趙國自兩漢及魏皆以
封建子弟後魏明帝又于廣阿城置殷州高齊改殷州

為趙州因趙國為名隋開皇十六年又于藥城縣置藥
州大業二年廢藥州以縣并屬趙州三年以趙州為趙
郡武德元年張志昂舉城歸國又改為趙州

州境

東西二百五十里
南北一百一十七里

八到

西南至上都一千八百九十里
西南至東都一千三十里

正東微南至冀州一百六十五里
西踰山至太原府五百六十里

北至恒州一百里

東北至豪城縣七十里從縣至定州一百二十里

貢賦

開元貢
絲
賦
絹

管縣九

平棘 元氏 臨城 柏鄉 高邑 贊皇

昭慶 寧晉 藥城

平棘縣 上郭下

本春秋時晉棘蒲邑漢文帝三年濟北王興居反遣棘蒲侯柴武擊之武帝時又有平棘侯薛澤為丞相蓋漢初為棘蒲後改為平棘也屬常山郡隋開皇二年改屬趙州十六年改屬藥州大業二年又屬趙州皇朝因之

斯汶水縣北三十五里

槐水一名白溝河南去縣二十五里

故藥城縣西北十六里春秋時晉邑

千萬壘縣南一里後漢安帝永初元年以御史任尚討
羌無功檻車徵還羌遂入侵河內趙魏間百姓相驚北
軍候朱寵將五營兵屯孟津詔魏郡趙國常山等繕作
塢壘六百一十處此即其一也

李左車墓縣西南七里

趙郡李氏舊宅在縣西南二十里即後漢魏以來山東舊族也亦謂之三巷李家云東祖居巷之東南祖居巷之南西祖居巷之西亦曰三祖宅巷也三祖李氏亦有地屬高邑縣

封斯村者李氏舊塋多在封斯

元氏縣上東南至州四十九里

本趙公子元之封邑漢于此置元氏縣屬常山郡兩漢常山太守皆理于元氏後漢書帝紀云世祖光武皇帝

建武四年光武北征彭寵陰后從行生孝明帝于元氏
傳舍又云顯宗孝明皇帝永平五年冬十月行幸鄴與
趙王相會鄴常山三老言于帝曰上生于元氏願蒙優
復詔曰豐沛濟陽受命所由加恩報德適其宜也其復
元氏縣田租更賦六歲賜縣掾吏及門閭走卒錢又云
肅宗孝章皇帝建初七年九月己酉幸鄴勞賜常山趙
國吏人復元氏租賦三歲元和三年二月戊辰進幸中
山遣使者祠北岳出長城癸酉還幸元氏祠光武顯宗

于縣舍正堂明日又祠顯宗于始生堂皆奏樂復元氏
祖賦三月丙子詔復元氏七年徭役其兩漢元氏縣在
今縣西北十五里故城是也晉屬趙國高齊廢隋開皇
六年又置元氏縣屬趙州皇朝因之

飛龍山縣西北三十里前趙錄曰河瑞元年王浚使將
祈弘擊鮮卑務塵部十餘萬東討石勒戰于飛龍山勒
師大敗

元氏故城在縣西北十五里即漢之舊縣也兩漢常山

太守皆理于此城至隋末為劉黑闥所破其後移于今所

開業寺在縣西北十五里即後魏車騎大將軍陝定二州刺史尚書令司徒公趙郡李徽伯之舊宅也

臨城縣

中東北至州一百里

本戰國時趙房子邑也漢以為縣屬常山郡自漢至隋不改屬趙州皇朝因之天寶元年改名臨城以縣西南十里有古臨城因改名焉

泚水在縣南二里出白土細滑如膏以之濯縣色若霜
雪如蜀錦之得江津也故俗稱房子之續魏都賦曰織
續房子

敦與山在縣西南七十里泚水所出

柏鄉縣 上北至州六十一里

本春秋時晉鄆 音呼各反 邑之地漢以為縣屬常山郡後漢

光武帝即位于鄆南千秋亭五城陌因改曰高邑屬常
山國高齊天保七年移高邑縣于漢房子縣東北界今

高邑縣是也隋開皇十六年于漢鄆城南十八里改置柏鄉縣遙取古柏鄉縣以為名屬藥州大業二年改屬趙州皇朝因之

高邑故城在縣北二十一里本漢鄆縣也

漢世祖廟一名壇亭縣北十四里鄆縣故城南七里即世祖即位之千秋亭也後于此立廟故後漢書帝紀云肅宗孝章帝元和三年三月丙子詔高邑令祠光武于即位壇是也

高邑縣

上東北至州五十五里

本六國時趙房子邑之地漢以為縣屬常山郡魏屬趙郡高齊天保七年移高邑縣于其縣城東北十五里今縣是也隋開皇三年改屬趙州皇朝因之

房子故城在縣西南十五里本漢房子縣也

馮唐墓在縣東北二十八里趙人也

贊皇縣

中東北至州七十里

本漢鄆邑縣之地屬常山郡隋開皇六年于此置贊皇

縣縣南有贊皇山因以為名屬藥州大業二年改屬趙州皇朝因之

贊皇山縣東南二十六里穆天子傳曰至房子登贊皇山

泚水在縣西南三十五里韓信斬陳餘處李左車曰陳餘軍敗于鄢下身死于泚水上是也

濟水源出贊皇山西北流去縣南十里此自別是一濟水應劭以為四瀆誤也

百陵岡在縣東十里即趙郡李氏之別業于此岡下也
岡上亦有李氏塋冢甚多

昭慶縣

望東北至州九十里

本漢廣阿縣屬鉅鹿郡後漢省後魏別置廣阿縣隋仁
壽元年改為象城縣大業二年又改為大陸縣屬趙州
武德四年復改為象城縣取縣西北古象城為名天保
元年改為昭慶縣

廣阿澤在縣東二十五里爾雅曰晉有大陸廣阿即大

陸別名淮南子曰鉅鹿大陸廣阿咸一澤也

任教墓一名七里邱在縣西四里高帝時為御史大夫
封廣阿侯

皇十三代祖宣皇帝建六陵高四丈周迴八十丈

皇十二代祖光皇帝啓運陵高四丈周迴六十步二陵
共塋周迴一百五十六步在縣西南二十里

寧晉縣

緊西北至州四十三里

本春秋時晉陽氏邑漢以為廩陶縣屬鉅鹿郡晉省後

魏于此置廩遙縣屬南鉅鹿郡隋開皇六年改為廩陶
復漢舊名大業二年改屬趙州天保元年改為寧晉

藥城縣 中東南至州三十九里

本漢關縣屬常山郡後漢省後魏太和十一年于此置
藥城縣取平棘縣舊藥城為名隋屬藥州又改屬趙州
皇朝因之

斯汶水在縣西北二十里

德州 平原上

開元戶六萬一千七百七十鄉一百十六
元和戶九千三百五十六鄉二十五

禹貢兗州之域春秋時屬齊戰國時亦為齊地秦兼天下今州秦之齊郡漢分齊郡置平原郡後漢至晉平原為郡國封建子弟後魏文帝于今州置安德郡隋開皇三年改為德州大業三年罷州為平原郡隋末陷賊武德四年討平竇建德復為德州

州境東西一百九十五里
南北二百一十九里

八到西南至上都二千五十里
西南至東都一千七百九十里

正南渡河至齊州二百四十五里

西南至博州二百六十里

西南至貝州二百三十里

西至冀州二百一十五里

正北微東至滄州二百四十里

東北至棣州二百四十里

貢賦

開元貢

綾

綿絹

管縣七

安德 平原 平昌 將陵 安陵 脩

長河

安德縣

緊郭下

本漢舊縣屬平原郡後魏屬安德郡隋開皇三年廢郡改屬冀州九年改屬德州皇朝因之

黃河南去縣十八里

鬲津枯河在縣南七十里禹貢兗州九河既道鬲津即九河之一鬲津至徒駭二百餘里今河雖移不離此城也

馬頰河縣南五十里

鹿角故關縣東南七十五里

平原縣

上東北至州四十六里

本漢舊縣屬平原郡後漢屬平原國後魏屬安德郡隋開皇三年罷郡屬冀州九年改屬德州皇朝因之

黃河在縣南五十里

王莽枯河在縣南五里

管輅祠在縣西南一里

平昌縣

上西南至州八十里

本漢舊縣屬平原郡後漢屬平原國隋開皇三年屬滄

州十六年改屬德州皇朝因之

馬頰河在縣南十里久視元年開決又名新河

將陵縣

望南至州五十里

本漢安德縣地屬平原郡隋開皇十六年于此置將陵縣取安德縣界故城為名屬德州皇朝因之

鬲津枯河南去縣二十里

王莽枯河西去縣十里

安陵縣

望南至州一百里

本漢脩縣地晉立安陵縣屬渤海郡本脩縣之安陵故以為名高齊省隋開皇六年重置屬冀州九年立觀州縣屬焉皇朝因之貞觀十七年觀州廢縣割屬德州

脩縣

上東南至州一百二十里

本漢條縣即條侯國也景帝封周亞夫為條侯漢條縣屬信都國後漢屬渤海郡晉改條為脩隋開皇三年廢渤海郡屬冀州五年改脩縣為脩縣屬觀州皇朝武德初亦屬觀州貞觀十七年觀州廢改屬德州

長河縣

上東至州五十里

本漢廣川縣地屬信都國後漢屬清河國魏封裴秀為
廣川侯高齊省隋開皇六年復置屬冀州九年改屬德
州仁壽元年改廣川縣為長河縣皇朝因之

漳水河自貝州漳南縣流入在縣西二十五里

王莽枯河東去縣五里

永濟渠縣西十里

張公故關縣東南七十里

棣州樂安上

開元戶二萬五千五百四十五

鄉四十八

元和戶五千四百四十七

鄉一十七

禹貢青州之域又兗州之域春秋為齊地管仲曰北至于無棣秦并天下為齊郡漢為平原渤海千乘三郡地曹魏屬樂陵國晉石苞為樂陵公是也隋開皇十七年割滄州陽信縣置棣州大業二年廢入滄州武德四年又置棣州六年又廢貞觀十七年又置移于厭次縣即今州理是也天寶元年改為樂安郡乾元元年復為棣

州

州境

東西三百四十九里
南北一百四十二里

八到

西南至上都二千二百九十里
西南至東都一千四百二十里

東南至青州三百二十三里

西南至德州二百四十里

南至淄州二百一十里

西南渡河至齊州二百五十里

正北微西至滄州二百五十里

東北至大海二百里

貢賦

開元貢
絹十疋
賦
絹
粟
麥

管縣五

厭次 滴河 渤海 陽信 蒲臺

厭次縣 上郭下

本漢富平縣屬平原郡後漢更名曰厭次則厭次前已廢矣相傳以秦始皇東遊厭氣至碣石次舍于此因名之高齊省隋開皇十六年重置武德初屬德州貞觀十七年于此置棣州

黃河在縣南三里

滴河在縣南四十里

通海故關在縣西南四十里

滴河縣

中東北至州八十里

本漢勃縣屬平原郡後漢省隋開皇十六年于此置滴河縣因北有滴河以名之屬滄州貞觀元年屬德州十七年改屬棣州

黃河在縣南八十里

滴河縣北一十五里漢成帝鴻嘉四年河水汎溢為害河隄都尉許商鑿此河通海故以商字為名後人加水

焉

渤海縣

緊西至州七十里

本漢蒲臺縣地垂拱四年分置渤海縣屬棣州在州東一百一十里天保五年以土地鹹鹵自縣西移四十里就李邱村置

大海在縣東一百六十里

陽信縣

望南至州六十里

本漢舊縣屬渤海郡魏屬樂陵國後魏置樂陵郡隋開

皇三年罷郡屬滄州十六年于陽信縣置棣州武德六年又置屬滄州貞觀十七年又割屬棣州

鈎般河即九河之一經縣北四十里

蒲臺縣

緊西北至州七十五里

本漢濕沃縣地屬千乘國宋屬樂陵郡隋開皇三年改屬滄州十六年改為蒲臺縣北有蒲臺因為名也隋末廢武德三年重置八年改屬淄州貞觀十七年置棣州割蒲臺屬焉

海在縣東一百四十里

海畔有一沙阜高一丈周迴二里俗人呼為鬪口淀是濟水入海之處海潮與濟相觸故名今淀上有甘井可食海潮雖大淀終不沒百姓于其下煮鹽

黃河西南去縣七十三里

蒲臺在縣北三十里秦始皇築此臺以望海于臺下繫蒲繫馬今蒲生猶繫結

元和郡縣志卷二十一

欽定四庫全書

元和郡縣志卷二十二

唐 李吉甫 撰

河北道 三

定州 博陵上

開元戶六萬五千四百六十 鄉一百三十
元和戶二萬六千八百三十二 鄉一百一十四

今為易定節度使理所 管定州易州 管縣十六
都管戶三萬六千四百

二

禹貢冀州之域亦堯帝始封唐國之地春秋時鮮虞白狄之國左傳曰晉荀吳侵鮮虞是也戰國時為中山國與六國並稱王後為趙武靈王所滅中山之地方五百里秦兼天下今州蓋秦趙郡鉅鹿二郡之地漢高帝分趙鉅鹿置常山中山二郡城中有山故曰中山景帝改為中山國封子勝為中山王哀帝崩立中山孝王之子衍是為平帝後燕慕容垂僭號建都于此仍置中山尹後魏道武帝平慕容垂子寶為中山郡置安州又改為

定州以安定天下為名也隋開皇元年以中字犯廟諱改中山郡為鮮虞郡大業三年改為博陵郡遙取漢博陵郡為名也九年又改為高陽郡隋末陷賊武德四年討平竇建德復置定州復開皇之舊名也天寶元年改為博陵郡乾元元年復為定州

州境

東西一百七十四里
南北三百里

八到

西南至上都二千八十五里
西南至東都一千二百二十五里

東至瀛州二百里

東北至冀州二百五十里

西南取橐城路至趙州一百九十五里
西北至蔚州四百七十里
北至易州二百五十里

貢賦

開元貢

兩窠細綾十四疋

管縣十

安喜 新樂 義豐 唐 望都 北平

無極 陘邑 深澤 恒陽

安喜縣

緊郭下

本漢盧奴縣屬中山國黑水故池在州城西北去縣四

里周迴百餘步深入不流俗謂水黑曰盧不流曰奴因

以名縣後燕慕容垂都中山故改盧奴為弗達縣

案弗達舊

唐書作不連

後魏平燕又改為盧奴高齊省盧奴移舊安喜

縣于此屬中山郡隋改為鮮虞縣武德四年復為安喜縣按安喜故城在今縣東三十里本漢安險縣後漢改為安喜縣蜀志曰先主嘗為安喜尉

澠水

澠苦候反

一名唐河在縣北八里

長星川南去縣八里

天井澤在縣東南四十七里周迴六十二里

新樂縣

中東北至州五十里

本春秋鮮虞國漢為新市縣之地隋開皇十六年置新樂縣屬定州取新樂故城為名也新樂者漢成帝時中山孝王母馮昭儀隨王就國王為建宮于樂里在西鄉呼為西樂城時人語訛呼西為新故為新樂

儀臺縣西南十三里後燕錄曰慕容麟與道武戰于儀臺燕師敗績

木刀溝在縣東南二十四里溝旁人姓木名刀因為名

義豐縣

緊西至州六十里

本漢安國縣之地屬中山國魏明帝追封后父毛嘉為
安國侯晉屬博陵國隋開皇六年改為義豐縣屬定州
皇朝因之

滹水俗名唐河縣北五里

派水縣西二十五里

解瀆故城縣東北九里本漢解瀆亭靈帝襲爵解瀆亭

侯桓帝崩無子竇武定策迎立即靈帝也

長林溝今名木刀溝經縣南三十三里

唐縣

上東南至州五十里

本春秋時鮮虞邑漢唐縣之地即古唐侯國堯初封于此今定州北有故唐城是堯所封也漢唐縣屬中山國高齊省入安喜縣隋開皇十六年重置屬定州皇朝因之

孤山蓋都山也縣東北五十四里

涑水一名唐河西去縣一百五十步

寡婦故城縣北九里後漢賈復追銅馬五幡賊于此築城後人語訛轉呼為寡婦

八度故關縣西北二十里

倒馬故關縣西北一百一十三里以涑水東經倒馬關山路險峭馬為之倒因以為名

望都縣 上西南至州五十里

本漢舊縣屬中山國以堯山在北堯母慶都山在南登

堯山見都山故以望都為名後魏屬北平郡高齊省隋開皇六年復置屬定州皇朝因之

唐水縣西南四十二里

陽城淀縣東南七里周迴三十里莞蒲菱芡靡所不生柳宿城縣東南四十二里宣帝母王夫人微時泣別于柳宿城即此地也

堯祠縣南四十里

北平縣 上西南至州八十三里

本秦曲逆縣地屬中山國陳平封曲逆侯後漢章帝巡
岳以曲逆名不善改為蒲陰縣後魏孝明帝改為北平
縣于今縣東北二十里置北平郡割中山國之蒲陰望
都北平三縣屬之高齊省北平郡及蒲陰縣以北平縣
屬中山郡隋開皇三年屬定州皇朝因之萬歲通天二
年契丹攻圍七旬不下故改為徇忠縣尋復舊名
蒲陽山在縣西北四十里

濡水縣西五里

安陽故關縣西北二十五里

無極縣

上北至州八十里

本漢毋極縣屬中山國後魏太武省高齊重置屬中山郡隋開皇三年改屬定州萬歲通天元年改毋為無潏洹水南去縣三十五里

陘邑縣

中北至州三十里

本七國時中山國之苦陘邑漢苦陘縣也李克為中山相苦陘之吏上計入多于前李克曰苦陘無山林之饒

而入多于前是擾亂吾人也遂免之漢屬中山國章帝
改為漢昌魏文帝改為魏昌高齊省隋開皇十六年改
置隋昌縣屬定州武德四年改曰唐昌天寶元年改曰
陘邑

廉頗臺在縣西南十九里慕容恪與冉閔戰于魏昌冉
閔大敗即此也

木刀溝在縣南二里

深澤縣 中西北至州九十里

本漢南深澤縣也以涿郡有深澤縣故此加南以別之
屬中山國高齊省隋開皇六年分安平縣于滹沱河北
重置深澤縣屬定州皇朝因之

滹沱河縣南二十五里光武為王郎所追至滹沱欲渡
導吏還言水深無船左右懼上使王霸前膽水霸恐驚
衆乃言可渡比至冰合以囊沙布冰上乃渡未畢數車
冰陷今名溝旁合處為危渡口

恒陽縣 上東至州六十里

本漢上曲陽縣屬常山郡後漢屬中山國高齊天保七年除上字但為曲陽縣屬中山郡隋開皇六年改曲陽為石邑縣其年移石邑于井陘縣屬恒州七年于此置恒陽縣屬定州以在恒山之南因以為名

恒山在縣北百四十里常水所出周官職方氏并州山鎮曰恒山是為北嶽漢以避文帝諱改曰常山至周武帝平齊復名恒山

長星溝水在縣西北十七里

郊壇縣東南十二里後燕慕容垂都中山置壇于此郊祭

後燕故苑縣西南十五里

恒岳觀在縣南百餘步

真君廟在縣東北十里嘉禾山下

恒岳下廟在縣西四十步

北平軍在州西三里開元十年置

易州

上谷上

開元戶三萬七千二百二十七
元和戶五百六十九

鄉七十二
鄉四十五

禹貢冀州之域虞及周為并州地春秋時屬燕晉戰國時屬燕趙秦置三十六郡以為上谷郡漢分置涿郡今州則漢涿郡故安縣之地隋開皇元年改為易州因州南十三里易水為名大業初為上谷郡遙取漢上谷以名為隋亂陷賊武德四年又改為易州高陽軍在州城內開元二十年置

州境

東西二百一十里
南北四百四十七里

八到

西南至上都二千三百四十五里
西南至東都一千四百七十五里

東至莫州一百九十里

東北至幽州二百一十里

西北至蔚州取飛狐路三百六十里
北至媯州取故城頭路四百里

貢賦

開元貢

絹

絲

墨

管縣六

易

涑水

容城

遂城

滿城

五迴

易縣

上郭下

本漢故安縣屬涿郡文帝以申屠嘉為故安侯隋開皇

十六年于漢故城西北隅置易縣故城即燕之南郡周迴約三十里

孔山在縣西南四十五里有鍾乳穴深不可測

涑水自蔚州飛狐縣流入

易水一名故安河出縣西寬中谷周官曰并州其浸涑易燕太子丹送荊軻易水之上即此水也

武陽故城縣東南七里故燕之下都

范陽故城秦范陽縣也縣東南六十二里以在范水之

陽故名蒯通說武信君使賜范陽令侯印趙地聞之不戰而下者四十餘城

樊於期故城縣西十三里於期授首荆軻處

涑水縣

上西南至州四十二里

本漢迺縣

迺子由反

屬涿郡後周省入涿縣隋開皇元年又

于此置范陽縣遙取漢范陽為名十年又改為永陽縣

屬幽州十六年改屬易州十八年以重名改涑水縣縣

近涑水為名

涑水一名巨馬河縣東北二里袁紹將崔巨業攻圍故
安不下退軍南還公孫瓚擊破之于巨馬水死者七八
千人即此水也

石泉故城縣西北三十里在衆山之內平山之中四周
絕澗壁立五丈水不周處路不容轍

容城縣上西北至州八十八里

本漢舊縣屬涿郡高齊省入范陽縣隋開皇元年改置
迺縣天寶元年改為容城復漢舊名

遂城縣

上北至州七十里

本漢北新城縣屬涿郡後魏除北字尋又省隋開皇三年移後魏新昌縣于此屬易州十六年改新昌縣為遂城按縣城即戰國時武遂城也趙將李牧攻燕拔武遂方城即此也後魏孝武帝永熙二年以韓瓚為營州刺史行達此城值盧曹構逆就置南營州以瓚為刺史所部三千餘人並雄武冠時因號英雄城

滿城縣

中東北至州一百四里

本漢北平縣屬中山國高祖以張蒼為北平侯後漢世祖追銅馬五幡賊于北平破之即此後魏于此置永樂縣天寶元年改為滿城縣以縣北故滿城為名

五迴嶺在縣西北五十里高四十里許

案此下舊有建安元年魏太祖

表封公孫度為永寧鄉侯度曰我王遼東何永寧也
二十七字是別條所引脫去上下文錯置于此今刪

五迴縣

中下東至州七十里

本漢北平縣地開元二十四年刺史田暉奏置在五迴山東麓因名之二十四年刺史田琬以其險隘東遷于

五公城在今易縣西五十里

滄州景城上

開元戶九萬八千一百五十七
鄉一百七十九
元和戶九千五百一十四
鄉三十九

今為滄景節度使理所
管滄州景州管縣十二
索都管戶數傳寫缺

禹貢冀州兗州之域後魏孝明帝熙平二年分瀛州冀
州置滄州以滄海為名隋大業二年罷州為渤海郡武
德元年改為滄州二年陷竇建德四年討平建德州仍
舊

州境

東西三百二十二里
南北四百五里

八到

西南至上都二千二百二十里
西南至東都一千三百六十里

東至大海一百八十里

東南至棣州二百五十里

西南至景州一百二十里

西南至德州二百四十里

西北至幽州五百五十里

貢賦

開元貢

柳箱

葦簞

糖蟹

鱧鮓

賦

絲

絹

管縣七

清池 長蘆 魯城 鹽山 饒安 樂陵

無棣

清池縣

緊郭下

本漢浮陽縣屬渤海郡在浮水之陽後魏屬滄州隋開皇十八年改為清池縣以縣東有仵清池因以為名

仵清池縣東南一十五里

長蘆縣

上東南至州三百四十里

本漢參戶縣地周大象二年于此置長蘆縣屬章武郡水經云長蘆水名也水旁多蘆葦因以為名隋開皇屬

瀛州貞觀後改屬滄州

參戶故城一名木門城在縣西北四十里

薩摩陂在縣北十五里周迴五十里有蒲魚之利

魯城縣上南至州一百里

本漢章武縣屬渤海郡有鹽官高齊省隋開皇十六年
于此置魯城縣

大海在縣東九十里

平魯渠在郭內魏武北伐匈奴開之

鹽山縣

上西至州六十里

本春秋齊無棣邑也管仲曰北至于無棣漢于此置高城縣屬渤海郡武帝以平津鄉封公孫弘即此縣鄉也隋開皇十八年改為鹽山縣

鹽山在縣東南八十里

饒安縣

上北至州九十里

本漢千童縣即秦千童城始皇遣徐福將童男女千人入海求蓬萊置此城以居之故名漢以為縣屬渤海郡

靈帝置饒安縣以其地豐饒可以安人後魏屬滄州隋不改皇朝因之

胡蘇河在縣西五十里

無棣河在縣南二十里

樂陵縣 上北至州一百三十五里

本燕將樂毅攻齊所築漢以為縣屬平原郡即漢大司馬史高所封之邑後魏屬樂陵郡隋開皇三年罷郡屬滄州

重合故城縣東二百步漢重合縣武帝封莽通為重合侯

無棣縣

上西北至州一百二十里

本春秋時齊之四履北至之地在漢為陽信縣地隋開皇六年割陽信饒安置無棣縣以南臨無棣溝因以為名屬滄州

橫海軍在州城西南開元十四年置

景州

上

元和戶二千二十五

鄉一十五

案是州廢自貞觀至貞元乃重置故不載開元戶

鄉及
貢賦

本漢景城縣屬渤海郡隋開皇三年罷郡屬滄州十六
年又于長蘆縣置景州大業二年廢武德四年重置貞
觀元年廢以所屬縣分入滄州貞元二年于弓高縣重
置

州境

案州境里
數傳寫缺

八到

西南至上都二千一百里
西南至東都一千二百四十里

南至德州二百里

西南至冀州二百一十里

北至瀛州一百四十里

東北至滄州二百二十里

貢賦

元和貢 葦簞

賦 縣 絹

管縣五

弓高

南皮

景城

東光

臨津

案五縣志文並傳寫缺佚

又攷唐書地理志有幽州即范陽郡其縣曰薊曰幽都廣平曰潞曰武清安次良鄉昌平有涿州亦范陽郡其縣曰范陽歸義固安新昌新城有瀛州即河間郡其縣曰河間高陽平舒束城有莫州即文安郡其縣曰莫曰清苑文安任丘長豐唐興有平州即北平郡其縣曰盧龍石城馬城有媯州即

媯川郡其縣曰懷戎有擅州即密雲郡其縣曰密雲燕樂有薊州即漁陽郡其縣曰漁陽三河玉田有營州即柳城郡其縣曰柳城此九州三十有三縣元和時其名不改王應麟通鑑地理通釋載歸義縣之易水固安縣之方城故城猶據元和志今傳寫各本皆缺佚之



元和郡縣志卷二十二

欽定四庫全書

史部

元和郡縣志卷二十三

詳校官編修_臣曹城

檢討_臣德生覆勘

總校官庶吉士_臣倉聖脉

校對官中書_臣鮑之鍾

謄錄監生_臣蔣翰

欽定四庫全書

元和郡縣卷二十三

唐 李吉甫 撰

山南道

唐書地理志山南道有江陵府即
荊州南郡其縣曰江陵枝江當陽長林石

首相滋公安荊門有峽州即夷陵郡其縣曰夷陵

宜都長陽遠安有歸州即巴東郡其縣曰秭歸巴

東興山有夔州即雲安郡其縣曰奉節雲安巫山

大昌有澧州即澧陽郡其縣曰澧陽安鄉石門慈

利有朗州即武陵郡其縣曰武陵龍陽有忠州即

南賓郡其縣曰臨江豐都南賓墊江桂溪有萬州

即南浦郡其縣曰南浦武寧梁山皆列襄州之前

又舊唐書地理志山南西道有商州即上洛郡其

縣曰上洛豐陽洛南商洛上津安業後改安業為
乾元新唐書列商州于關內道杜佑通典置于洋
州之後王應麟玉海與通鑑地理通釋載商州商
洛及江陵松滋夷陵遠安奉節各條謂據元和志
今傳寫各本
並缺佚之

襄州

襄陽大都督府

開元戶三萬六千三百五十七
元和戶十萬七千一百七

鄉七十七
鄉一百六十二

今為襄陽節度使理所

管襄州鄧州復州郢州唐
州隨州均州房州管縣

三十八都管戶一十四萬二千

禹貢荆豫二州之域于周諸國則穀鄧鄠盧羅郛之地

春秋時地屬楚秦兼天下自漢以北為南陽郡今鄧州
南陽縣是也漢以南為南郡今荊州是也後漢建安十
三年魏武平荊州置襄陽郡自赤壁之敗魏失江陵而
荊州都督理無常處吳將諸葛瑾陸遜皆數入其境自
羊公鎮襄陽吳不復入永嘉之亂三輔豪族流于樊沔
僑于漢水之側立南雍州孝武帝以朱序為南雍州刺
史苻堅遣將苻丕攻陷襄陽序為丕所擒後堅敗州復
歸晉安帝時魯宗之為刺史仍于州理置寧蠻校尉梁

太清二年岳陽王蕭詧為雍州刺史兄河東王譽為元
帝所殺詧怒以州北附西魏克江陵以詧為梁王都江
陵為西魏藩國恭帝改雍州為襄州因州南襄水為名
也按襄陽去江陵陸道五百里勢同輔車無襄陽則江
陵受敵自東晉庾翼為荊州刺史將事北伐遂鎮襄陽
北接宛洛跨對樊沔為荊郢之北門代為重鎮周置總
管隋置行臺皇朝初亦置山南道行臺武德七年廢行
臺置都督府貞觀六年廢都督府改為州永貞元年并

為大都督府

州境

東西二百四十六里
南北三百六十七里

八到

西北至上都一千二百五十里
北至東都八百二十五里

東至隨州三百五十里

東南至郢州三百二十里

南至江陵府四百七十里

西至房州陸路四百二十里水路五百八十四里

西北至均州三百六十里

貢賦

開元貢

火麻布
絁絹

庫路真

元和貢

麝香
弩材

綾紗
漆器

竹扇

橙子

柘木

管縣七

襄陽 臨漢 南漳 義清 宜城 樂鄉

穀城

襄陽縣

望郭下

本漢舊縣也屬南郡在襄水之陽故以為名魏武平荊州分南郡置襄陽郡縣屬焉後遂不改

峴山在縣東南九里山東臨漢水古今大路羊祜鎮襄陽與鄒潤甫共登此山後人立碑謂之墮淚碑其銘文

即蜀人李安所製

萬山一名漢臯山在縣西十一里與南陽郡鄧縣分界處古諺曰襄陽無西言其界促近

檀溪在縣西南初梁高祖鎮荊州聞齊主崩令蕭遙光等五人輔政謂之五貴歎曰政出多門亂其階矣陰懷平京師之意潛造器械多伐斫竹木沈于檀溪為舟裝之備參軍呂僧珍獨悟其旨亦私具櫓數百張及義師起乃取檀溪竹木裝戰艦諸將爭櫓僧珍每船付二張

事克集今溪已涸非其舊矣

州理中城在縣東邊一處有土赤色昔苻丕攻襄陽朱序用道法以硃沙燻之至今土色有異西北角有夫人城苻丕之攻也朱序母深識兵勢登城履行知此處必偏受敵令加修築寇肆力來攻果衄而退因謂之夫人城

劉琦臺縣東三里琦與諸葛亮登臺去梯言之所也

諸葛亮宅在縣西北二十里

習郁池縣南十四里

臨漢縣

緊南至州二里

本漢鄧縣地即古樊城仲山甫之國也西魏于此立安
養縣屬鄧城郡周天和五年改屬襄州天寶元年改為
臨漢縣

縣城南臨漢水魏將軍曹仁據樊蜀將關羽圍樊使于
禁龐德救之會漢水暴漲羽以舟師攻禁禁遂降羽德
瞋目不屈羽殺之

故鄧城在縣東北二十二里春秋鄧國也桓七年鄧侯
吾離來朝是也楚文王滅之

鄧塞故城在縣東南二十二里南臨宛水阻一小山號
曰鄧塞昔孫文臺破黃祖于此山下魏常于此裝治舟
艦以伐吳陸士衡表稱下江漢之卒浮鄧塞之舟謂此
也

南漳縣中東北至州一百四十里

本漢臨沮縣地按臨沮縣今在荊州當陽縣西北臨沮

故城是也後魏于此置重陽縣隋為南漳縣

荆山在縣西北八十里三面險絕惟東南一隅纔通入

徑

祖山

祖音

在縣東北一百八里吳將朱然諸葛瑾從沮

中乘山險道北出祖中去襄陽城百五十里按此是地

名非山蓋以地山相近因名或云司馬宣王鑿八疊山

開路于此停阻也

襄水出縣北一百一十里白石山

義清縣 中東北至州五十八里

本漢中廬縣地也西魏于此置義清縣後因之

中廬故縣在今縣北二十里本春秋廬戎之國秦時謂之伊廬項羽亡將鍾離昧家在伊廬也

長渠在縣東南二十六里派引蠻水昔秦使白起攻楚引西山谷水兩道爭灌鄢城一道使沔北入一道使沔南入遂拔之

宜城縣 上北至州九十五里

本漢即音忌縣地也城東臨漢江古諺曰即無東言其東

逼漢江其地短促也宋孝武帝大明元年以胡人流寓者立華山郡理之後魏改為宜城周改宜城為率道縣屬武泉郡隋開皇三年罷郡屬襄陽皇朝因之天寶元年改為宜城縣

漢水在縣東九里

故宜城在縣南九里本楚鄢縣秦昭王使白起伐楚引蠻水灌鄢城拔之遂取鄢即此城也至漢惠帝三年改

名宜城

樂鄉縣

中下東北至州二百二十里

本春秋時郛國之城在今縣北三十七里郛國故城是也。在漢為若縣地。晉安帝于此置樂鄉縣。屬武寧郡。隋大業三年改屬竟陵郡。皇朝改屬襄州。

漢水東去縣四十二里

穀城縣

上東南至州一百四十五里

本春秋時穀國。左傳穀伯綏來朝。今縣北十五里故穀

城是也漢為筑音逐陽縣蕭何子封筑陽侯即此也隋開

皇七年改為穀城縣屬襄州

筑水在縣南百二十步

鄧州 南陽上

開元戶三萬八千六百一十一 鄉五十八
元和戶一萬四千一百四 鄉六十一

禹貢豫州之域周為申國戰國時屬韓蘇秦說韓宣惠

王曰韓西有宜陽東有穰清是也秦昭襄王取韓地置

南陽郡以在中國之南而有陽地故曰南陽三十六郡

南陽居其一焉漢因之領縣三十六理宛城後漢于郡
理置南都建安中張繡屯兵于穰降魏魏于穰置萬州
晉宣王夏侯伯仁皆為都督或理宛或理新野永嘉五
年為劉聰所沒成帝咸康四年復歸于晉苻堅之亂又
沒前秦姚興時又復還晉後魏孝文帝南侵又陷之梁
普通中暫克還入魏太和中置穰州理穰縣今鄧州所
理是也隋開皇七年梁王巋入隋自穰縣移萬州還江
陵于穰縣置鄧州大業三年改為南陽郡武德二年復

為鄧州

州境

東西五百九十里
南北三百八十一里

八到

西北至上都九百五十里
北至東都六百四十五里

東至唐州三百二十里
南至襄州一百八十里

西南至均州三百四十里
東北至汝州四百七十五里

貢賦

開元貢
賦 白紵 絲布
布 麻

管縣七

穰

南陽

新野

何城

臨湍

菊潭

內鄉

穰縣

望郭下

漢舊縣本楚之別邑取豐穰之義後屬韓秦武王攻取之封魏冉為穰侯漢以縣屬南陽郡後魏既克南陽于此城置荊州隋開皇三年屬鄧州皇朝因之

湍

音專

水北去縣七里

六門堰在縣西三里漢元帝建昭中召信臣為南陽太守復于穰縣南六十里造鉗盧陂累石為隄旁開六石

門以節水勢澤中有鉗盧王池因以為名用廣灌溉歲增多至三萬頃人得其利後漢杜詩為太守復修其陂百姓歌之曰前有召父後有杜母

南陽縣

縣西至州一百二十里

本周之申國也平王毋申后之家漢置宛縣屬南陽郡更始即帝位世祖納陰后

案原本避唐太宗諱世祖作代祖今改從史文

並于

宛城魏代荊州都督所理至隋改為南陽縣屬鄧州

精山在縣西北二十七里黃巾賊據宛城漢西鄉侯朱

雋擊破之餘衆走保精山謂此也

清水東去縣三里南都賦曰清水盪其胸是也

新野縣

中西北至州七十里

本漢舊縣也屬南陽郡魏代新野縣為荊州都督所理
王昶為都督即鎮此城晉惠帝立新野郡隋開皇三年
罷郡縣屬鄧州

清水西去縣二百步

後漢西華侯鄧晨宅在縣北二十四里晨新野人世祖

姊夫也初起兵新野王莽焚其冢墓滂其宅宗族怒曰
幸自富足何故隨婦家入湯鑊中晨終無恨

陰皇后宅在縣東北擣衣石存焉

何城縣 上西南至州一百九十里

本漢西鄂縣地春秋時何邑江夏有鄂故此加西後魏
孝文帝于古何城置何城縣屬涇陽郡貞觀九年改屬

鄧州

豐山在縣南三十二里有九鐘霜降則鳴

西鄂故城在縣南二十里張衡即此縣人故宅餘址猶存

魯陽關在縣北八十里今鄧汝二州于此分境荊豫徑途斯為險要張景陽詩云朝登魯陽關狹路峭且深博望故城在縣東南四十五里張騫封邑

臨湍縣

上東南至州八十五里

本漢冠軍縣地後魏孝文帝割縣北境置新城縣屬南陽郡廢帝以近湍水改為臨湍隋文帝復改為新城天

寶元年又改為臨湍縣

翼望山在縣西北二十里湍水出焉

冠軍故城在縣南四十里漢武帝以霍去病討匈奴功冠諸軍故封此縣以褒異之

後漢膠東侯賈復宅在縣南三十五里

楚堰在縣南八里擁斷湍水高下相承八重溉田五百餘頃

菊潭縣上東南至州一百五十里

本漢酈音縣武陶戍之地後魏廢帝因武陶戍置郡隋

開皇三年罷郡以為菊潭縣因縣界內菊水為名屬鄧

州

菊水出縣東石澗山其旁多菊水極甘馨谷中三十餘
家不復穿井仰飲此水皆壽百餘歲王暢袁隗為太守
命酈縣月送水三十斛飲食沐浴悉皆用之

內鄉縣

上東南至州二百四十里

本楚之析邑後屬于秦史記秦昭王發兵出武關攻楚

取析十五城是也漢以為縣屬弘農郡後漢屬南陽郡
後魏于此置析陽郡廢帝改為中鄉縣隋開皇三年以
避廟諱改為內鄉屬鄧州

析水北自盧氏縣界流入與丹水合古今謂之析口

縣城即楚析縣也史記楚頃襄王元年秦出武關斬楚
衆五萬取析十五城漢高祖入關下析酈是也

復州 竟陵下

開元戶五千二百三十二
元和戶七千六百九十

鄉一十一
一十五

禹貢荊州之域春秋戰國並屬楚史記白起拔郢東至
竟陵即此是也秦屬南郡在漢即江夏郡之竟陵縣地
也晉惠帝分江夏立竟陵郡周武帝改置復州取州界
復池湖為名也貞觀七年州理在沔陽縣寶應二年移
理竟陵縣

州境

東西四百三十里
南北六百九十里

八到

西北至上都一千六百八十五里
西北至東都一千四百二十五里

東至沔州陸路三百四十里水路七百里
東北至安州三百三十里

南至沔陽縣一百三十里自縣南至岳州水路五百里

西北至郢州陸路二百五十里水路三百里

貢賦

開元貢白紵

賦布麻

管縣三

竟陵 沔陽 監利

竟陵縣

中郭下

漢舊縣也屬江夏郡舊縣在今郢州長壽縣界竟陵大城是也周屬復州隋大業三年改復州為沔州縣屬不

改武德初又屬復州

五華山在縣東北七十里

縣城本古風城也古之風國即伏羲風姓也南臨汭水

沔陽縣

中下北至州一百三十里

本漢雲杜縣地梁天監二年分置沔陽縣即今縣東三

十里沔陽故城是也今沔陽縣即後魏所置建興縣隋

大業三年改建興縣為沔陽郡武德五年改郡為縣屬

復州

沔水在縣南八十步東入汭川縣界

馬骨湖在縣東南百六十里秋夏氾漲淼漫若海春冬水涸即為平田周迴一十五里

監利縣 中下東北至州二百六十里

本漢華容縣地也晉武帝太康五年分立監利縣屬南郡隋開皇三年屬復州

大江在縣南一百三十里

元和郡縣志卷二十三